



Хулам аспирант губернатор грант моцатсат



Хор: Антон Русмиленко

Антон Русмиленко – кимет курсан уталтыман кимет пуш там грант моцатас.

Там хаццам ятан, Овс мув шимлац мир хоятат элты, хулам аспирант ЯНАО губернатор грант ёша паятсат. Шит Антон Русмиленко, Любовь Возелова па Светлана Тусида.

Кашц хоятэв сот щёрас солдува ёша паятац рупатайл елды тутал ураңан.

Антон Русмиленко – Тюменской индустриальной университет Институт транспорта хоца улты аспирант, кимет курсан уталтыл, па кимет пуш там грант моцатас. «Ма туты рупатаеман артадалэм, хоты донц таксарашак машинайн верты. Туняд шитам охладан лабороторной установка лутсам. Тампуш нумаслам, шитам охдам экспериментальной исследования верты ураңан посатты», – Антон Константинович ястас.



Хор: Любовь Возелова



Хор: ЯНАО губернатор пресс-служба

Светлана Тусида – шитты охладан научной журналата ханшты рупатайлал сохаптаты верытдалды.

Любовь Возелова – Научной центр изучения Арктики хоца научной сотрудника рупитал. Ханты ясаң ванан тайдалды, туңа-щира уталталды, хулмет пуш губернатор грант шитас. «Грант моцатытэм ураңан ма ун рупата версам: стажировка яңхсам, фольклорно-этнографической экспедиция Надымской района верыдысам, лингвистической материал акатсам,

Любовь Возелова – ханты ясаң ванан тайдалды, туңа-щира уталталды, хулмет пуш губернатор грант шитас.

«еңта пасан» суран ханты ясаң уяты мохет актыдыслам. Луңан нумаслам Дорвош па Приуральской район хуват экспедиция щиран яңхты, научной рупата ханшты», – Любовь Геннадьевна ясаң верас.

Светлана Тусида – М.В. Ломоносов нэмпи Северной (Арктической) федеральной университетан олаңмет курсан уталтыл, аспирант нэм моцатас. Шитты охладан лув научной журналата ханшты рупатайлал сохаптаты верытдалды. Шци тумпийн научно-практической конференцията яңхты.

Кашц таҥ КМНС хоца улты няврэмат губернатор грант моцатты верытдалды. Мет олаң пуш тамац вер 2021 таҥан верса. Шципан, хой лаңхал учёной мир педа питты, итамиты нэпекдан китыдылдан.

Алина Тоярова ханшам потар

Тохлаң хапат яңхта питсат

Ун кер тылац холъёмет хатдна Охсарка эвалт Белояр педа манты таҥ ёс лап тохарса. Шитна Пулцават эвалт итта тохлаң хапат яңхта питсат. Мет алаң тохлаң хап мули ёхтыдыяс.

Тохлаң хапат яңхты пора Приуральской район нэңхэт ораңна сэңк ям пора, сок ант

вантман масты порайна вул вас педа ёхатта рахал.

Тохлаң хап тынал вул нэңху ораңна 2 820 солдува, ай няврэмат ораңна па 1 410 солдува. Лапат кат пус яңхта питл, кимет па хутмет хатл.

Вера Лонгортова хансам потар

Дорогие ямальцы!

От всей души поздравляю вас с 79-ой годовщиной со дня Великой Победы!

В этот торжественный день мы склоняем головы перед подвигом наших великих предков, которые отстаивали свободу и независимость нашей Родины в Великой Отечественной войне.

9 мая – праздник мужества, стойкости и несгибаемой воли советского народа, который смог выстоять и победить в самой страшной войне в истории человечества.

Весомый вклад в Великую Победу внесли ямальцы. Все они мужественно сражались на фронтах, трудились в тылу. Чтим память павших героев, отдавших свои жизни за наше мирное будущее. Вечная слава и низкий поклон всем, кто защищал Родину.

Сегодня наш долг – сохранять и передавать из поколения в поколение память о тех героических событиях. Мы должны быть достойны подвига наших отцов и дедов, строить сильную и процветающую Россию.

Пусть этот великий праздник вдохновляет нас на новые достижения, объединяет наши сердца чувством патриотизма и гордости за свою Родину.

Губернатор Ямало-Ненецкого автономного округа
Д.А. Артюхов

Дорогие фронтовики, ветераны и труженики тыла! Дорогие ямальцы!

Поздравляю вас с праздником Великой Победы!

9 Мая – это праздник величия подвига народа-победителя, его беспримерного мужества, стойкости, неисчерпаемой силы и единения в борьбе с фашизмом. Этот день для нас навсегда будет самым священным.

Мы храним память о тех, кто отстоял Отечество и сокрушил нацизм. Мы гордимся теми, кто сегодня на поле боя продолжает дело своих отцов и дедов, защищает интересы страны, показывает пример бесстрашия и героизма. Россия крепка связью поколений и людьми, готовыми ради неё на подвиг. Наш народ един и в горе, и в радости. Так было и будет всегда!

Желаю всем света, мира, тепла сердец и простого человеческого счастья!

Председатель
Законодательного Собрания
Ямало-Ненецкого автономного округа
С.М. Ямкин

Овс мув шимлаң мир хоятат яха уйтанысат

Там дапатаң Москва вошан Хон мувеван улты Овс мув шимлаң мир ёх «Сокровища Севера» вантопсайн уйтанысат. Хон мув регионат элты тус хоятат ёхтыдысат: арысат, яксат, вантопсайт дэсятсат, думатты сохдал, пормасдал альсат.

Вошат па районат элты тус хоятат Ямал мувев элалтысат. Вантопса манам порайн, Овс мув шимлаң мир, Сибирь па Дальний Восток Ассоциациян рупитты ёх, шоши мир хоятат, законодательной па промышленной тахаятан улты кусяйт еңта пасан суран актацисат, уйтантапсайт верыдысат.

«Хон мув шоши мир шимлаң ёх улты сирлув сайлаты верат», Федеральной закон хольмаң педа ветмет тад рупитты сирн, там постаң уйтантапса верса.



Хор: Альбина Тырлина

Хоты шоши мир хоятата улты сирдал елды туты па ялап нётапсайт дэсятты, потар манас.

Си тумпийн, «Овс мув шимлаң мир хоятат ясаң па улапса», хотгэд хоятат Тада

постаң семинар верса. Рут ясаң па улапса уятты па уталтыты ураңан, дэсятм методат па формаит альсайт, методической лаборатория рупитас. Сади́ка яңхты няврэмат кеша урок элалтыса. Уншак няврэмат ураңан мастер-классат верман усат.

«Голос Севера» литературной конкурса потрат, монсят, дуңтарат ханшты Овс мув хоятат актыдысайт. Ялап потрат ханшам хоятат, рупатайдал элты потар тусат.

Кашң регион дув дэсятм хардал элалтысат, презентацият версат. Кашң номинациян нох питаң па призёрата этам хоятат мойлапса нэпекатан юкантапсайт па мойлаптапсайт.


Альбина Тырлина ханшам потар

Ялап нэпек дуңтаты, ханшты хоятлув уйтаты

Там дапатаң Ёмвош элты нёхты хор верты нэ Ольга Корниенко, Юрий Вэлла ханшам потардал похла актаң нэ, «Эринтур» альманах куца Татьяна Юргенсон Пулцавта ёхтыдысқан.

Ун кер тыдащ хольмаң педа хутмет хаталан дуңатты нэпекат шавиты хотан «Юрий Вэлла. Избранное» дуңатты нэпекат хоятата элалтасқан.

Худам книгага дэщатам Юрий Вэлла ханшам дуңтарат па потар шупиет понман улдат.



Книгайдалан Надежда Михайловна Талигина ханшам хорат понман улдат.

Юрий Вэлла улмад хуват тус ясаң тайты, торды потар каталты хоята аялса. Мув илпи элты тут йиңк па тут шув ёхатты организацият куцайдал педа ёвра этты верат элты ещад потарта, улты мувдал, касалты юшдал шукатты верат иса аратысды. Ханшам потардалан щит элты па ханшман ул.

Нэпекдал дапат мир ёх ясаңата понман улдат. Дув кутэдан «Азбука оленевода» па «Топонимический словарь».

Вантопсайн Юрий Кылевич хоятата хайм, ёлта хащам потрал «Последний монолог» нёхты хор хуват альса. Хота лув улты хоятат инцасдалды: «Хоят – щит хой? Муй кеша ул? Антома йитад юпийн, улты мирада муй хайд?»

Улмад хуват, сэма питаң мувадан ус, няврэмдал энмалтас, вудыдал шавийс. Тамащ туң щираң, палтапды, уйтаң хоят ур ёх, ханты па охаль хоятлув кутан ус. Ходна соткем тадат хащдат, дув ёшадан ханшам нэпекдал дуңатман, хоятал нумман тайты питла.

Зоя Куртимова ханшам потар

Мир хуват верты вантопса округеван манал

«Душа Севера» лов элты нёхарты пормасат вантопса-конкурс, унт дор тыласян Новый Уренгой вошан верда.

Яртгяң хон мув элты ярсот педа худам нэпек китман ус. Си вантопса Новый Уренгой тыйм ветгяң тада постаса.

Яртгяң мир мув элты си касасая дапатгяң педа вет Россия мув хоят, худам хоятан – Индия па Казахстан элты, катан – Белоруссия, Туркменистан, Монголия, США, Кыргызстан па Китай элты пирыса. Касасая пирыты хоятат Ас нопатты тыдасы олаңмет хатл юпийн ястадайт. Ветгяң хоят туп пирыда.

Си вантопсайн, антом туп уятты хоятат касты питлат. Энамты няврэмат лов элты нёхарты хорамдал элалтыты верытлат па туса вератты хоятат пидан уйтанытыты па уталтыты.

Альбина Тырлина ханшам потар



Хор: Альбина Тырлина

Умща якилдылат, туслад алилдылат



Вениамин Ильич Тарагупта якты уталтаты эвидал пидан.

Ун кер тыдащ хащам шутцаты хатлатан округ каш верты хотан «Ма пидэман яка» ун вантопса ус. Хащам талан няврэмат, муй якат уталтасат па атэд емаң хатлатан альсат, ин йи ун вантопсая верса.

ОЦНК хоцца, «Следующее поколение» якты уталтыты студия яңхты няврэмат пидан «Краски Севера», «Сияние Гор» ансамбльнан па «Nota Bene» якты театр концерт альсат.

«Ашкудая манмеман, ма антеман холна ОЦНК хота якты уталтыты группая ханшлтасайм. Там пуш нядмет тала йис, хоты ма «Следующее поколение» якты студияйн Вениамин Ильич Тарагупта хоцца якты уталтыдам. Ләпат няд пуш актащлув. Мет одңа даварт ус. Метыдысам. Курдам-ёшдам кашет усат. Ант

лаңхасайм яңхты. Ин уталсам па ям, даварт щак антом. Айшак улдемман, антеман, тухал ишан ун антеман, ун ащеман тутдысайм па ёхи вуйдысайм. Ин урокдам етшаты юпийн утца хухалдам. Каш верты хотан яка якты эвидам пидан уйтантыдам», – яң тад доват якты эвие Юлия Малышкина ястас.

Хорамаңа ләцатам вантопсайн антет-ащет, рут хоятат умащдыман вантсат, хоты ал волиты ермак щашкан элты ёнтам сохатан няврэмие



Юлия Малышкина няд тад якад.

курдал ант щалитман яксат, навартсат па дарысат. Ай тәдан уталтаман, муйкем даварт, сценая эттыйн, няхты веншан хоятата амтапса туты.

Зоя Куртямова ханшам потар

Ар няврэмаң хоттэлат нётдайт

Ас нопатты тыдащ олаңмет хатл вуш элты, ар няврэмаң хоттэлат ураңан, ялап нётпсайт рупитты питлат.

- Мет олаңан, коммунальной митэд сахат 30% ёхды ёхтаптада;

- Ашкудайн уталтыты няврэмдал электронной сертификатан малайт, кашң няврэм 15000 солкувайн;

- Нушая улты хоттэлат, щёхар тыдащ олаңмет хатл унты, 5000 солкувайн няврэмдал малайт.

- Хоцаң куцаел лялян антома ки йис, курк тыдащ 23-мет хатадан нётпса охан малайт.

Штрафат элатлайт

Ләваса хухатдыты ампат ураңан штрафат элатлайт. Щи вер го-сударства комитет ЯНАО Зак-собрание актащийм порайн ялпа вантса.

Ин, щи хоятат, хоятат амплал вош па курт хуват вольняя хухатдылат, 4000 солкува сохататы питлат. Там хатлатан 1000 па 2500 солкувая хойлдыс.

Па ки моштада, хой хоцаң ампат па шушидылат – 5 000 солкува сохататы мосты питал. Ин 3000-5000 солкува сохатты-сат.

Мушаң няврэмат лекщитты таха

Губкинской вошан няврэмат ураңан №10 микрорайонан ялап леккар хот омасда. Ван хатлап тыдащ сохантыйн етшаптада.

Йи хатл сахат щита 200 няврэм вантты питла. Щита вет няврэм атаң-хатл вантты ураңан хайилдыты верытла. Туңа-щира верты диагноз ураңан леккарат щита хащилдылат.

Аллина Тоярова ханшсалды

Емаң номас тайты лента

Волаң Ляль постаты хатл унты Хон мувеван «Георгиевская ленточка» акция манал. Округ хоятлуд ищи пуңалан ант хащсат.

Там пуш Пулцаватан па Приуральской районан хулам щёрас молтас ленточка лакки маты ястаса. Лорвош районан волонтеры Победы Ас нопатты тыдащ яртъяңмет хатл унты щёрас лента лакки ортлат.

Муши вошан мет одңа утхотан рупитты куца ёх щи акция хоцца пидтацсат. Там емаң номас тайты

лента сам мевал пелка тахарман тайты мосад. Ёшан тайты тучаң хырата, машинаята, ай няврэм руц онтпата хорам юкана ант ярты. Ләваса ёвалты па ант рахал. Муңев восты турам идпийн щуняңа улты ураңан, Волаң Ляль порайн опращлуд дылдал масдал.

Георгиевской ленточка каш верты, айлат ёх актащты хотатан па Ас нопатты тыдащ емаң хатла ләцатам харатан рахал вуты.

Зоя Куртямова ханшам потар



Хор: Альбина Тырлина

Ун Лялян удам рут хоятлүв



Ас нопатты тыдась яртъяңмет хатадан хон мув хоятат Ун Ляль емаң хатл постаты питдат. Кашң вошан, куртан улты хоятат си хатадан лялян удам рутлүв нумадмилдат па кев хар хося рутлүв касытылат.

Кашң хот эдты хоятат ляля маныдысат. Ханты хоятлүв кутан улдат хоятат, хой ляль эдты ёхтыдыйс, хой па, там пора унты лялян удам верал эдты нэмотты ант уятда. Там лопасан Ун Лялян удам Тарасоват хоттэд хоятат эдты потрэм тудэм, Ун Ляль емаң хатла постадэм.

Асов куртан Наталья Яковлевна Тарасова ул, рутлүв эдты потар тус: «Асем – Яков Гаврилович Тарасов. Ун асем – Гаврил Васильевич. Ун асем аси – Василий Захарович.

Ун Лялян удам ун асем, ун асем яйлал па рутлүв эдты ун хоятлүв эдты инсясысам, «Книга Памяти» нэпекан каншсам. Ияха акатсалдам па родословной нэпека лэсятсалдам. Тарасоват рут эдты ар хоят ляля маныдыйс, ар хоят ёхды ант ёхтас.

Асем кат пуш ляля вуйдыса. Бригадира улмад ураңан кат пуш Омск вош эдты кусяятан ёхды кератса. Рыбоучасткан ёх хоят шимад ус, ляль ураңан худ мосятты па лэсятты мосас. Ситы ляля ант манас, труженник тыла ус».

Ун асем

Наталья Яковлевна ун асел Гаврил Васильевич 1902-мет талдан сэма питас. Ун Ляля Хушавт утхот «Новый Путь» колхоз эдты 1942-мет талдан щёхар тыдасын вуса, рядовая ус. Ляль эдты ёхи ёхтас. Хул ведман рупитас, Дорвош район Почётной хоята лүңтасас. 1968-мет талдан антома йис.

Ун асем аси

Василий Захарович Тарасов Гаврил Васильевич аси. Ийимел – Наталья Михайловна Сюртахова, 1865-мет талдан сэма питас, Тохат курт нэ. Дорвош пуңадан си курт ус.



Мария Алексеевна Ковалёва (Шульгина) опец Евдокия Константиновна Шульгина пилан. Евдокия Константиновна там тыдасын ярсот педа вет талда йис.

Вет няврэм тайсаңан: Анна, Данил, Наталья, Мария па Гаврил – Наташа ун асел.

Ун асем аси апсел

Ун асем аси апсел – Данил Захарович. Ийимел – Анна Владимировна Сандрина, Кевавт нэ. Няврэмлал: Данил, Павел па Николай пилан похңан. Павел Ун Ляля вуйдыса. 1944-мет талдан парас.

Ун асем апси

Ун асем апси – Павел Васильевич Тарасов, 1914-мет талдан сэма питас. Ийимел – Анастасия Дмитриевна, Асов курт хотатан усңан. 1941-мет талдан щёхар тыдасын худамхосяңмет хатадан Кушавт утхотан Дорвош РВК

эдты ляля вуса. Ляль харан 310-мет стрелковой дивизияйн, 1082-мет стрелковой полк хося пошкан орытты хоята лүңтасас, рядовая ус. Ленинградской область Кириши станция пуңадан 1942-мет талдан уйт дор тыдасын олаңмет хатадан антома йис.

Наталья Яковлевна ун асел аси яйлал няврэмат па лялян усат. Александр Андреевич, Андрей Прокопьевич, Павел Данилович па па Тарасоват хоттэд хоятат Ун Ляля маныдысат па ёхды ант ёхатсат. Там хатл



Хор: Наталья Тарасова

Йидап тал эвалт луңатта питда

Там пус Охсар курт 424-мет сэмна питам емаң хатдад верта питл. Приуральский район Дума депутатат уйтантысат па нэпекна постасэл, Охсар курт сэмна питам хатл 1600-мет тал эвалт луңатта питда.

Пулңаватна олты И.С. Шемановский нэмпи пормас савиты хатна ропытты научный сотрудник, нэпекат вантытад кутна моцатсалды, мет алаң ясңат Охсар курт пушци – Воксаровский па Пантуйский – воеводайт кутладна хансам письмайт хоца моцатсайт.

Щёрс хутсатмет тална Мирон Шаховский князь отряд Тапад вас эвалт Мангазея педа этас. Князь Москва педа хан-

сам нэпекад эвалт дырамса, Пантуев вас хоцаңна хапэл ид лоңмад.

«Остякат лавты ясаңна Woksarit-wasch, самоедат па Pandu-garden, Ас ям пелакна лайл, лапатъёң молтас километрайна Обдорск эвалт. Карра щита крепость олмал, остякат мув. Woksar остякат лавты щирна ки охсар», – щимащ нэпекна хансам ясңат учёный пормас савиты хатна моцатас.

Пантуев вас па щиты Охсар ёхан эвалт олты Пандо хаттэл ораңна нэматса, щит дув йис олты ханты мувдал. Щи нэпекат онтасна дырамса хоты Охсар курт пушци мули 1600-мет тал эвалт хансда.



Хор: Вера Лонггорова

Охсар курт ашкода лап тохарда



Хор: Вера Лонггорова

Охсар курт ашкода капремонтна верты ораңна лап тохарда. Ван хатлап тыдащ ветхоцъёңмет хатл маса ант ропытта питл, щит пушци ашкода кушайт лавсат.

Ун кер тыдащ 24-мет хатл эвалт мули йи пелкад лап тохарса. Айсак классна онттыды нявремат кутна ашкодайна, кутна ялан дистанционно, выпускной классатна онттыды

нявремат топ ашкодайна яңхта питлат. Щёхар тыдащ эвалт вантхатлап тыдащ маса 5-11-мет классна онттыды нявремат интернатна онттыда питлат. Ищиты кутна-кутна дистанционной образование хыщал. Начальной классатна онттыды нявремат па «Солнышко» нявремат хатл сыс савиты хатна онттыда питлат.

Онттыда етсаты нявремат ораңна последний звонок па выпускнойт нох ант вудайт, оллимел щирна манлат.

Щимащ касты хар нидмет пус верда

Ашкодайтна ропытты классный руководителат ораңна Всероссийский форум хоца касты ораңна заявка китты пора пунсса.

Щимащ касты хар нидмет пус верда, Хон мув хуват нявремат пидна ропытты нэңхэт аса Москва васна ай тахайт потты тыдащ холмет

хатл эвалт ветмет хатл маса яха акатдайт. Щита касты ораңна «ВКонтакте» площадка хоца онлайн пирыта питлайт, камантсы этап олта питл: анкетирование, тестирование па визитной карточка.

«Нявремат пидна ропытты нэңхэт ораңна верты форум мет ямми луңтасл. Лув верты ропатаед ант рахал ант сыялата, онттыды процесс ловатлна дув лэщатлэл», – Хон мув Министр просвещения Сергей Кравцов лавас.

Заявочной кампания мули пунсса па ущ тыдащ ёңмет хатл маса манта питл.



Хор: Вера Климова

Мет ям звание сытта дьтлат

Овс мув «Снежинка» станция па мув вантыман яңхты нэңхэт халлиты комплекс «Рай-Из» Хон мув ловатна мет ям звание сытты касты харна каслат. Тарко-Сале васна олты студенческий комплекс па мет ям нэм сытты тахайна касл.

Итта, лув орциладна Достижение.рф. сайт хоца онлайн голосование пунсман ол. Уйт дор холмет хатл маса пирыта рахал. Ямал мув мет ям проект презентация ВДНХ «Россия» выставка манты тахайна эттала.

«Снежинка» станция Кеват кутна верда. Хон мув па мир тэл учёныят тал хуват щита ропытта веритта питлат.

«Рай-Из» туркомплекс ищи Кевна верда, щита нымална нэхамтыта рахата питл, халлиты хат, дюхытыт таха, тал хуват тайты кас верты харат.

Тарко-Сале васна олты студенческий кампус па нявремат средне-профессиональной онттыды таха эвалт центр подготовки кадров верта дьтлат.



Хор: ИА «Приуралье»



Хор: topblogger.livejournal.com

Дув ляляпса элты ант ёхтас

Муя па иса па хорпи? Кашитал – иса щиты:

Ищиты турам – ядпа па этар,
Щит щи унт, щит щи дад рув па щит щи йицк,
Туп дув ляляпсы элты ант ёхтас.

Манэм ин оша ант понты, хой тунашак ус
Волды веккеша урая хойман.
Манэм мосмитты питас дув туп ин –
Хун дув ляляпса элты ант ёхтас.

Дув машьяя омсас па ёврая арыйс,
Дув иса дылды потартас,
Дув манэм олты ант мас, дув алаң нох килас,
Па молхатл ляляпса элты ант ёхтас.

Муй ин талтыя йис, анта щи элты потар:
Моштасам ма – мин китомтак усман...
Ма веккеша – матты вотан лап полса рат,
Хун дув ляляпса элты ант ёхтас.

Интам, матты, тови ким щитас, – Ёрэмаман, лувел вохматсэм:
– Духас, хахса хая! – Ёхды – щитам:
Дув молхатл ляляпса элты ант ёхтас.

Парам отлуд муцев шукан ант хайлэл,
Парам отлуд – муцев шавиман тайлэл...
Унт кутан турам, па йицк кутан турам, –
Па юхат этара ныдайт.

Минэмаңа мув хотан тэрмат ат ус,
Па манты пора и хорпия манас.
Ин иса уча. Туп кашитл манэм,
Щит ма – ляляпса элты ант ёхатсам.

Марина Рачинская толмацсалды

Восты охшамие

Нумлэм, ма хашам вер нопсэм
Охшамен лаңкар элты ил питмал.
Ма манмеман, вецката ястасан,
Восты охшамен шавиты.

Наң кепа ванан антом,
Ма – саман дойты пилэм –
Ма уйтлэм, наң олты тахайн
Хорам охшамен ханятман тайлэн.

Ханшам ясаңдан луңаттэман
Манэма тур сыен щащал.
Ясңат кутан восты охшамен этлийл,
Ма сэм одаңан вантлэм.

Матты ки, ляля мантэман,
Наң ма хоцаем ёхтыдымен.
Щуцаң сэман аңкартыман,
Наң улдан иса ма пуңлэман.

Муй арат ермак охшамат
Патан хоптанан тайдылдув.
Эвет лаңкардал, ешак ям потардал
Ляль хар лотан муң нумдылдув.

Лыв ураңан, ешак мосты нэңат ураңан,
Ёх хоят лялясал
Восты охшамал ураңан.
Муй олас эви лаңкар хоца!

Раиса Конева толмацсалды



Хор: triptonkosti.ru

Алёша

Новиял елтыян донщие, донщие,
донщие!
Новиял елтыян донщие, муй ертые
щёшийл так,
Рэп элты доял Алёша, Алёша, Алёша.
Рэп элты доял Алёша, Болгариян
руц солтан.



Хор: rutube.ru

Самеман ищипа шумаль, ищипа шумаль.
Самеман ищипа шумаль, муй щеляяң
вот юпийн
Кев элты дув ляль сохал, дув сохал,
дув сохал.
Кев элты дув ляль сохал, кев элты
дув сопекдал.

Муй арат палтапаң ныпан, палтапаң
ныпан,

Муй арат палтапаң ныпан ил питсат
айлат ёх.
Там – щит Алёша, Алёша, Алёша.
Там – щит Алёша, Болгариян
уятла хол.

Мува, щитаман понман, щитаман
понман,
Мува, щитаман понман, лувела ант
охапты ил.

Лыплат ант мойдал дув эвета, эвета,
эвета.

Лыплат ант мойдал дув эвета, лыплат
дыв тулат щий.

Иса улты най иты, вот иты, ерт иты.
Иса улты атл-хатл иты, ет тураман
хус иты.

Дув доял там вош нумпиян, вош
нумпиян,
Матты ки там вош нумпиян дув
дояс веккеша.

Новиял елтыян донщие, донщие,
донщие!

Новиял елтыян донщие, муй ертшики
щёшийл так,
Рэп элты доял Алёша, Алёша, Алёша.
Рэп элты доял Алёша, Болгариян
руц солтан.

Марина Рачинская толмацсалды

Победа хатл

Победа хатл, щи доват дув едан ус,
Хоты хурмом ратан лавам долдыяс.
Усат юшат, иса хишан восьмийм,
Там хатл муң вана пайтсэв хоты
верытсув.

Припев:

Щи Победа хатл
Щеляйн автас,
Щи емаң хатл
Вотумтом охсохат пидан,
Щи амтап
Сэм йицкат пидан.

Хор: bangkokbook.ru



Ат па хатл мартеновской кур
ов едпийн
Родинаев сэмдал лап ант пентсалды.
Ат па хатл даварт ляльтапса тусув –

Там хатл муң вана тусэв хоты
верытсув.

Припев:

Уща, ома,
Ёхатсув муң анта хол...
Няр курты лудн ат йицк
элты хухадматы!
Европа шуп, шушсув,
Мув шуп, –
Там хатл муң вана тусэв, хоты
верытсув.

Марина Рачинская толмацсалды

Номсаң партапсэт маты ях няврем

Хонты кепа сокалт ях няврем ос. Сэңк нуса ос, хонты харты дытыт ант таяс. Щиты олман, мув вантты номасна ёхатса, масаң, халща дытыт моцатл. Хув сосас-ван сосас, ида педайна, хоц метман, дыта дьтман куд орна ёхтас. Вантдалды па, дыс лыпина ор щипки питам. Ях няврем щикем такан амтас:

– Итта хоты ма дувел кавартлэм, каврам хасэңк щикем хув ант енщсам!

Щи курамна ор щипки нэңху турна потартта питас:

– Ад велы манэм, щи лампа ям вера, эсды.

Ях няврем сэңк самаң ос, ор щипки щадли йис дувел, эсалсалды. Итта ор щипки тохалдал пелак пунссалды па лавал:

– Сэңк самаң олтэн ораңна ма наңен тамащ ясчат лавлам. Мана там ёс хуват, вуд юх сыядатэн маса, щи юх элты нох хоңха па варсат сайна ханемаман ат хуват амса. Щи юпина сыядалэн мала олта пилт.

Манас ях няврем ёс хуват, вуд юх сыялас, щи юх элты нох хоңхас па варсат сайна ханемас, амасл. Щиты олман холдалды, юх хоңаңна хой кепа щи потарттал щатл, щи эвалт щит холам ай нэңхуйи.

– Холлислан? – итл лавал. – Курт хоңаңна олты ай ёханьев хоц сармал, карра хоты щита мет сыстам йиңк енщта рахас! Топ тамиты верта масл, хой ёхан сыдна энамты унши юх ил эватдалды па мув лэрдал ким каралалды, щи нэңху ёхан йилпатта веритал, йиңк парта ёхатл.

– Ёвэй! Ма па йи номас тайдам, – кимет нэңхуйи лавас. – Курт хоңаңна олты ор лыпина карра щикем ар кураң

вай ос, итта па ит харты антам. Ант оцчат нэңхэт, щит, ваят ор лыпина лоңты тахайна лайты кураң вай аңтат эвалт палдат. Нох ки вулайт, итта кураң ваят мохты парта ёхатлат.

– Нын щи олман мала аса оцтытңан, ма па мала кепа оцдам, – холмет атэл лавал. – Курт коща эвел ар тал мули мосаң. Йи леккарна харты мосдал ямми верта ант веритлайт. Йи нэңху харты оцас ки, эвел най килты алаңна курт хоңаңна олты орна тотлита па ат йиңкна люхэмата, мохты лолан мосдал ямми йисат.

Потарсат щиты нэңхуйет па мантсат. Иттам энамты ях щи ясчат аса номсална вусды, ил охлас юх эвалт па курт педаропата канста манас.

– Масаң йиңк тотлита питдан? – Ях няврем элты лавса. – Муң итта йиңк хувалтта алду. Карра муң педэв ай ёхан овас, йиңк ванна ос, итта дув лап сарас.

Ях няврем ёхан овам тахавантысды, унши юх сыялас па лавал:



– Там унши юх ил ки эватла па мув лэрдал нох каралата, йиңк парта ёхатл.

Юх ил эватсэл, мув лэрдал нох караласдал – иттам ёханныйи щи лампа сыстам йиңкна ёхатса, енщта омащ.

Курт коща ях няврем дув хоцел вахсалды:

– Маса наң оцдан хоты верта, кураң вайт парта ат ёхатлат? Карра ивейна талаң тащат муң ору хуват яңхсат, иттам ит харты антам.

– Щит хоты век кон, оцдам щи, – ях няврем няхман лавас.

– Ор лыпина лоңты тахайна лайты кураң вай аңтат хоц ки паитлайт, кураң ваят мохты парта ёхатлат.

Курт коща кураң вай аңтат хоц паитта партсалды, иттам кураң вайт па парта ёхатсат, йи юпина яңхлат.

– Щи наң муңилу ямас партдалдан, – курт коща лавал. – Масаң наң оцдан хоты ма эвем мосат лечитта? Ар талды йис хоты мосдал эвалт хойл.

– Най килты алаңна эвен орна туви па ат йиңкна люхыты, – ях няврем лавас, – мосдал мохты мандат.

Иттам ики эвел орна тусды па ат йиңкна венсл люхэмасды – энамты ның ищикурмат ямми йис.

Иттам курт коща энамты ях майлаптата дьтта питсалды.

– Муң хоцев олта хыща, – ики лавал. – Манэм нятта питдан.

Щи пора эвалт ях няврем щита олта питас, партад маса тащаң ях карыяс.



Хор: Вера Лонгоргова

Вера Лонгоргова
толмащсалды



Касалты пора щит ёхтас



Хор: Вячеслав Лонгортов

Калаңаң нэңхэт хоцца, касалты вер щит лув олапсэд. Манты ёсэд олты хуват калаң эвалт лайл. Калаңат щиты ондаман оллаат, товыйи йил, лув ищки кансман Кев пела манта питлат. Щиты калаң савиты ях олты хуват лув юпидална манлат.

Касалты пора калаң нэңхэт ораңна олапсы иты манл. Хой олты хуват вутн яңхал, самдал йи тахайна амаста ант веритлат. Лувилал мув хорас омащ, лыпидал

лыщкамми йилат. Мала хорпи ищки, ватасат лув ар пелак ёсна оллаат. Касдыман тайты ёслад холна йис порайна понман оллаат. Щит ал ёсат ант оллаат, олам хуват пирьям тахайт. Мет хув

лайтэл пора, щит хонты суоват посхантлат, па порайна ивейна манлат.

Касалты хатл мет алаң киллат, касаң хаттэлна, касаң нэңху ошл мала лув верта масл. Ныңат ал кепе ор хат паитлат па аматлат. Мет алаңна ор хат лаңкаплад нох вулат, щит юпина олдал хослат, мет ялта хойты нароңат па кор нох вулат. Хат паитты верат етсаты юпина кораль верлат, щита ропытман тайты калаңат акатлайт. Масты калаңат моцаттэт юпина анасат кирлайт.

Карра эвалт ки вантман, там йисна вутн яңхты олапсы консакки йис, итта каман хорпи ёр ланц хапат оллаат, нави тут тайлат, сотовый телефонат, спутниковый связь. Топ каман йис пораят эвалт ит топ хыщас ищиты, щит калаң тащат. Там мувна, калаң олтал пушци – калаң нэңхэт олта питлат, щит йи моңхална йирам олапсы. Муң орцевна щит муң щирлу-пищлу, олапсэв па культураю, олты хуват манты ёс. Таматта, тамхатл, халэват...

Вера Лонгортова хансам потар

Аса касалты па лэщатылат

Епа улты Асна нопталты пора ёхатал. Луңан Саңхамкуртаң ёх Хишпана касалдат. Саңхамкурт элты, йиңк хуват, нопталты панэл унты 207 километра манлат.

Куртна ин няд семья ул. Луңан Хишпанан нопталлат, тадан па Кунават муван вой-хул велпасламан улдат. Доркурта па Горка воша ёхтылдыдат мосятам худдал-войдал матыя, лэот луттыя, хилыдал щутцаты хатлата тутыя.

Саңхамкуртаң ёх волаң ёдан ант улдылат, кашң хатл велпасламан яңхлат. Хоты ин улдат, муй верлат – щит элты Кристина Устиновна Тоярова каматса ясаң таксофон мохты ястас: «Ин ийикем, Тимофей Алексеевич, велпаслаты хотлад лэщатты манас, хащам лэоттлад нох вуты. Ванты, луң сыс нэмолты вой вана ант ат ёхтас. Тал кеша юх эватты. Велпаслаты пормаслад туңа-щира йи тахая понты». Тухал ишан вой каншман 30-40 ки-

лометра куран па лонщхопан яңхлат. Охсар, долмах, нёхас, лаңки, ондатра, лэпак тал сыс моцатылат.

Ин тыдащ молтас хащас Аса касалты унты. Патан туты пормаслад акатлаллал. Холаплад,

хоплад, луплад па мотурлад луң сыса лэщатлаллал. Ин Ун Аса тут ун йиңк питтыин ёхатлат, ханты худ велпасладат.

Аллина Тоярова ханшам потар



Хор: Альбина Тырлина



<p>Газета «ЛУХ АВТ» Адрес редакции: 629003, ЯНАО, г.Салехард, мкр. Богдана Кнунянца, д.1, каб. 106 (34922) 4-68-63 E-mail: luh.avt@yamal-media.ru</p>	<p>Учредитель Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д.9, каб.708)</p> <p>Газета зарегистрирована Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года Регистрационный ПИ № ТУ72-00558</p>	<p>Тираж 1340 Заказ 0695 Подписные индексы: на год – ПА700, на полугодие – ПР561</p> <p>№ 18 (1217) Газета вышла в свет 4 мая 2024г. Подписано в печать 2 мая 2024г. по графику: 16.00 фактически: 16.00 Газета выходит по субботам</p> <p>Цена годовой подписки 88 руб., в розницу не распространяется</p>	<p>Издатель Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб.708)</p> <p>Отпечатано в АНО «Ямал-Медиа» Юридический адрес: 629003, Ямало- Ненецкий автономный округ, г. Салехард, мкр. Богдана Кнунянца, д.1, каб. 106 Фактический адрес: 629007, Ямало- Ненецкий автономный округ, г. Салехард, ул. Чубынина, 39А</p>	<p>Генеральный директор АНО «Ямал-Медиа» Зулинова Марья Андреевна</p> <p>Главный редактор Яковлева Аллина Кирилловна</p>
---	--	--	--	--